

Date – 07/02/2025

Time - 18:30 Hrs

1. All Mizoram VC Association President in VC term pawh tawi chungchanga Mizoram sawrkar a khinna chu vawiin khan Guwahati High Court Aizawl Bench chuan a hnawl.
2. Chief Minister Pu Lalduhoman 16 Finance Commission-ah Airport tih changtlunna tur leh runway thar siamna tur an dil dawn a, an sum mamawh ang a pe thei a nih chuan Mizoram sawrkar-in Lengpui Airport enkawl zui a inhuam reng a ti.
3. National Games vawi 38-na Uttarakhand-a neih mekah Mizoram tan Lalthlamuanpuia'n Taekwondo Men's Poomsae inelna ah Gold Medal a la.
4. Telephone hmanga damloten Doctor-an rawn theihna Tele Manas kaltlangin ramchhunga damlo doctor rawn mi nuai 18 chuang an tling tawh.

<><><>

### VC/LC POLLS

All Mizoram VC Association President in VC term pawh tawi chungchanga Mizoram sawrkar a khinna chu vawiin khan Guwahati High Court Aizawl Bench chuan a hnawl.

AMVCA hian an President Pu K Lalngaizuala hmingin nikum November ni 21-a sorkar VC term thla 6-a a pawh tawina order an khin chungchanga thutlukna chu vawiin khan High Court chuan ti chhuak in Mizoram sorkar in hnehna a chang a, Thubuai hi a tirah sorkar order hmasa khinna a nih avangin AMVCA hian hnuk kirin sorkar order hnukung zawk khinna tur an thehltut leh a. Hemi chungchang ngaihtuah hun tura ruahman tun thla ni 13 khan AMVCA chu dan ang thlap register an nih loh avangin an ukil te thurawn angin hemi ni vek hian an inhnukdawk leh a. A tuk, tun thla ni 14 khan thubuai hi an President hminga thehltut leh niin January ni 15 khan High Court chuan sorkar chu insawifiah turin a ti ta a ni.

Heti hian AMVCA ten inthlan chungchanga sorkar an khinna chinfel anih takah chuan State Election Commission-in tun thla ni 12 a Village Council leh Local Council inthlan neih tur a ruahman chu kalpui tlang a ni ang.

<><><>

### GOVERNOR

Larsap Gen Rtd Vijay Kumar Singh chuan vawiin khan Republic Day Camp (RDC) a tel Mizo NCC Cadet 58 te hmuahna leh an puala lawmpuina hun a buatsaih.

Larsap chuan ram pum huap leh ngaihhlut hlawh Republic Day Camp (RDC) a Mizoram NCC Cadet-an tel thei chu ropui a tih thu leh, hemi tura Mizorama NCC Unit hrang hrangte thawhrimna, inpekna leh rawngbawlina chu chhuanawm a tih thu sawiin, NCC chuan thalaite nunah inthununna, hruaitu zia leh ram hmangaihna a tuh a ni, a ti a, NCC chu ram hruaitu chherchhuaktu pawimawh tak a lo ni tawh thin tih sawiin NCC ah chuan taksa leh sipai lam kaihhnawih intuaihriamna mai bakah kawng engkima hmasawna ngaihpawimawh a ni tih a sawi.

Larsap chuan Mizorama thalai tam zawkte'n NCC an zawma hma an sawn pui ngei a beisei thu a sawi a. NCC Directorate Northeast Region te hlawhtlinna chu cadet mai bakah nu leh pate tana chhuanawm tak a nih thu sawiin, NCC hmalakna ah ram leh hnam dah pawimawh hmasak a ni thin chu entawntlak a tih thu a sawi a. NCC chuan thalaite nun a tha zawngin a kaihruai a, mipuiten thlawp tlat a tul tih a sawi baw.

<><><>

### AIR SYMPOSIUM

Ram hmasawn nana thalaite tih tur inhrilhhriatna atana buatsaih Symposium chu vawiin khan Akashvani Aizawl Multipurpose Hall ah neih a ni. Vawiina hun hman Symposium hi "Role of the Youth in Nation's Development" tih thupui hmanga buatsaih a ni a, he huna thusawitu Akashvani Aizawl Director leh Mizoram Cluster Head Pu DR Lalropuia chuan thalaite chu hnam hmasawn theih nana lungphum pawimawh tak an ni a ti a, thalaite chu ram hmasawn zelah dinhmun pawimawh tak an chelh tih sawiin India in kum 2047-a ram hmasawn Viksit Bharat a nih theih nana tha thawh nasa thei ber chu thalaite an ni tih sawiin he hmasawna hun thleng tur leh tel ve

thei turin mahni hriselna dinhmun vawn that a pawimawh a ti a, ram hmasawna chu thalaite kutah tam tak a innghat tih a sawi bawk.

Vawiina hun hmanah hian Mizoram University atangin Prof Irene Lalruatkimi; Pachhunga University atangin Dr Lalnundika Hnamte, Govt Aizawl College atangin Asst Prof Pu Mark V Vanlalrema leh MZU-a Research Scholar Pu Rosangliana Pachuau te chu Resource Person ah hman niin zirlai kalkhawmte tana thu pawimawh tak tak an sawi a ni.

Vawiina Symposium buatsaih ah hian Assistant Director (News) Pu Gin Gangte, Program Executive Pu N H Ringa Tara, Program Executive Pi Judy Darhmingmawi leh Programme Executive Pi Lalrammawii te an tel a ni.

<><><>

## **NGOCC**

Chief Minister Pu Lalduhoman 16 Finance Commission-ah Airport tih changtlunna tur leh runway thar siamna tur an dil dawn a, an sum mamawh ang a pe thei a nih chuan Mizoram sawrkar-in Lengpui Airport enkawl zui a inhuam reng a ni a ti.

Mizoram NGO Coordination Committee (NGOCC) chuan, vawiin khan Chief Minister Pu Lalduhoma hmuin Mizoram in Airport a neih chhun tun hnaia Indian Air Force (IAF) kuta Mizoram sawrkar-in hlan a tum chu ngaihtuah nawn turin an ngen a, Chief Minister chuan, Airport chu enkawl a hautak em em a, ram dang anga Airport changtlung leh tha an duh a nih chuan midang enkawl duh an zawn a ngai a, hei vang hian Sawrkar kal tawh zawng zawngte pawhin, Airport enkawl hautak zia hriain AAI leh IAF kuta hlan tumin an lo dawr tawh a ni a ti.

Chief Minister chuan, Lengpui Airport chu ramchhunga state hrang hrang zingah sorkarin a enkawl awmchhun a ni a. Khawi State mahin Airport an enkawl zo lo a, Airport Authority of India (AAI) meuh pawhin an Airport enkawl hi Private Company-te hnenah an hlan mek tih sawiin, Mizoram ang state rethei-in Airport zo leh zo loa a enkawl chu a hautak hle a, Airport changtlung tak Mizoram-in a neih chu Sawrkar in a duh ber a ni a ti bawk.

Chief Minister chuan, 16 Finance Commission-ah Airport tih changtlunna tur leh runway thar siamna tur an dil tur pawh NGO te chuan theihtawp chhuahin Mizoram sawrkar hmalak tum dan hi lo dawra lo sawipui turin a ngen tih a sawi bawk a ni.

NGOCC chuan, kum 2024 August ni 9 khan Lengpui Airport hi IAF kuta hlan an remti lo tiin thuchhuah a lo siam tawh a, vawiin khan Chief Minister hnenah ziakin "Lengpui Airport IAF kutah hlan lo tura ngenna" lehkha an thelut a, an sawiho zui nghal a ni.

Mizoram NGOCC-ah hian, Central YMA, Mizoram Upa Pawl, Mizo Hmeichhe Insuihkhâwm Pawl, Mizo Zirlai Pawl leh Mizo Students' Union an tel a ni.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

## **NATIONAL GAMES**

National Games vawi 38-na Uttarakhand-a neih mekah Mizoram tan Lalthlamuanpuia'n Taekwondo Men's Poomsae inelna ah Gold Medal a la, National Games tun inelnaa Mizoramin Gold Medal a lak hmasa ber a ni.

Lalthlamuanpuia hian Gold medal a lakna kalkawngah hian a tumpuite hneh vekin round tinah a chungnung thin hle a, Knock out round luhna tura in thlitfimna leh seeded zawna Pre quarter round-ah point 7.916 hmuin point a hmusang ber a. Knockout round ah pawh chungnungin Finalah hian National Games hnukung ber Goa-a Gold medal latu Services Sports Control Board (SSCB) ami Dingku Singh nen an in tum leh a. Boruak tang tak karah Thlamuanpuia hian Dingku Singh lakah hian point hmuh theihna zawng zawngah a chungnung zia a ti lang vek thei a. Point 8.199 hmuin champion lai Dingku hian point 7.999 a hmu thung a. Venghlu tlangval Lalthlamuanpuia hi chaka puan a ni.

National Games 2025-ah hian Mizoram chuan medal pahnih a la a, Lalthlamuanpuia hma hian Nazareth Lalthazuala chuan Wushu huangah bronze medal a lo la tawh bawh a ni.

<><><>

### **TELEMANAS**

Union Minister of State for Health and Family Welfare Prataprao Jadhav chuan telephone hmanga damloten Doctor-an rawn theihna Tele Manas kaltlangin damlo doctor rawn India ram pumah nuai 18 chuang an awm tawh thu a sawi.

He thu hi vawiin Lok Sabha rorel inkhawmah Union Minister of State for Health and Family Welfare chuan sawiin, Tele Manas chu tawng 20 chuang a kalpui mek a nih thu a sawi a, hemi atan a sum ruahman pawh cheng vaibelchhe 343 a nih thu leh India ram pumah Ayushman Bharat Health Account ID vaibelchhe 73 siam a nih tawh thu a sawi bawh.

<><><>

### **UKRAINE**

Ukraine chuan France sorkar hnen atangin Indo thlawhna Mirage 2000 jet fighter panga a dawng. He thu hi French Defence Minister Sebastien Lecornu chuan vawiin khan sawiin, jet fighter pawh a bi kima Ukraine hnena hlan a nih tawh thu a sawi a, France sorkarin indo thlawhna Ukraine a pek tur thu hi nikum June thla khan French President Emmanuel Macron chuan a lo sawi tawh a ni.

<><><>